

Riba peticion di gobierno di Aruba

CFT lo evalua presupuesto di 2015 y ta keda involvi

ORANJESTAD – Aruba y Hulanda a yega na un acuerdo riba cooperacion cu College Financieel Toezicht (CFT) pe presupuesto 2015 y tambe den futuro.

Esaki ambos gobierno a informa via nan medionan. Manera Bon Dia Aruba a publica tabatin un discrepancia entre locual gobierno di Aruba a skirbi den e presupuesto modifica (supletorio) tocante e cooperacion cu CFT y locual e organo mes a skirbi den un carta pa gobernador siman pasa.

Den e ley di presupuesto (Memorie van Toelichting) gobierno a skirbi cu mester demostra CFT prome cu 4 december con ta yega na un presupuesto balansa aki 4 aña. Pero siman pasa CFT a bisa cu nan no tin poder legitimo pa duna conseho riba presupuestonan di Aruba (sola-



mente riba presupuesto 2014, a base di e KB di Consejo di Minister di Reino CFT tabata autorisa pa duna un conseho). Aunke minister di Financia di Aruba mes a haci un peticion riba 19 di november pa duna un conseho riba e presupuesto di 2015.

Awor e situacion a cambia y ambos pais a haya otro pe colegio di supervision financiero por keda involvi. Locual e

CFT mes a propone caba (den e carta di siman pasa tambe) pa laga Aruba cay bou CFT pa garantisar un control financiero independiente. E ora Aruba lo haya un miembro den e colegio aki tambe.

Cooperacion futuro Ayera no a sali cla si esaki lo ta e caminda cu gobierno di Aruba kier gana. Siman pasa gobierno a indica cu nan ta prefera un conseho di supervision (Fiscal Counsel, Consejo Fis-

cal) propio. Pero den e relato ayera por ripara cu den un of otro forma CFT ta keda involvi: “E procedura aki (conseho di CFT riba presupuesto) lo wordo sigui pa un areglo structural aceptabel pa ambos gobierno.

Despues di e reforma di 2014 y e añanan siguiente, gobierno di Aruba a presenta un cuadro pluri-anual pa yega na un deficit di 0,5% na 2017 cu perspectivanan economico positivo. Gobierno di Hulanda y di Aruba a palabra tambe cu den corto tempo lo drenta den deliberacion cu otro pa hunto busca e forma mas adecua pa formalisa e cooperacion entre Consejo di Minister di Reino y e Colegio di supervision financiero pa den futuro.”

Rey Willem Alexander
NoticiaCla a publica ayera, prome cu e noticia cu ta sigui e cooperacion cu CFT a sali, cu ‘tin reunionnan intenso

andando entre Aruba y Hulanda, riba e presupuesto’ di 2015. Tambe e fuente ta bisa cu Rey Willem Alexander a topa gobernador di Aruba Fredis Refunjol diamars, pa haya informacion riba ultimo desaroyo riba Aruba. Locual e Cas Real a confirma y riba e website a publica e potret di e encuentro na Paleis Noordeinde (potret ta di Dirk Hol).

E gobernador ta na Hulanda pa atende e concierto anual di Reino cu ta tuma luga riba 15 di december. Riba e dia ey Hulanda ta celebra Dia di Reino (Koninkrijksdag). Dialuna e Rey a papia cu e gobernador di St. Maarten y mañan cu esun di Corsou.

E presupuesto di 2015 ainda no ta entrega na gobernador, pues mester sigui e resto di e proceso legislativo ainda. Segun ley e presupuesto mester ta na parlamento no mas tarda cu 1 di september. □